



Selasa, 20 April 2021
Hakim-hakim 4: 17-24



Diberu si cerdas



Jael eme ndehara Heber bangsa Keni, ia sekalak si cerdik. Uga kin si ikataken cerdik e? *Dalam Kamus Besar Bahasa Indonesia, cerdik diartikan: pintar, cerdas dan cekatan.* Ertina tole ietehna kai si arus ibahanna tanpa kesangsin alu tujun si payo. Bage me asum Sisera reh ku kemahna, Sisera e puanglima tentera Jabin Bangsa Kanaan. Raja ras puanglima Bangsa Kanaan e kejam man Bangsa Israel. Lalap erlebuh Bangsa Israel e mindo penampat man Tuhan. Emaka sekali jadi ihuntakken Tuhan Sisera rikut ras gereta perangna kerina mate tentera Sisera, ia ngenca sekalak tading. I bas kebiarena kiam ia, paksa si e me reh ia ku kemah Jael.

I bas kemah e mehuli kal ibahan Jael man Sisera. Ilayanina labo ibahanna teridah ukurna paksana ia berhadapen ras musuh bangsana. Iberekenna kerina keperlun Sisera i bas kemah e. Berekenna keamanen ingan cibuni, brekenna minem susu. I bas ntabehna medem Sisera ban latihna, i je me ibunuh Jael si Sisera. Ipekpekkenna alu martel ras pantuk-pantuk arah pipi Sisera pultak me ku taneh. Ilakokenna alu yakin, alu pasti seh mate Sisera e. Dibata mereken kemenangan man Israel bas musuhna si terakhir eme Sisera erkelangken sekalak diberu si cerdik eme Jael. Si jadi penungkun, selaku diberu, La nge Jael e gugup njemak perpalu guna munuh Sisera? Adi ibaba ku bas kecibalta genduari, banci labo pang kita ngelakokenca. Tentuna Jael pang ngelakokenca alu gegeh siibereken Tuhan. Sebab tading Sisera me musuh bangsana, kerina tenterana enggo kerina mate. Selaku Moria si cerdik, sieteh kai si arus siilakoken, si erguna man dirinta, jabunta bagepe kalak si deban. Kita banci jadi Moria si cerdik adina kita tetap njaga hubungenta ras Dibata. Emaka sipegegehi tetap erlebuh mindo man Tuhan, gelah kai siilakoken kita si mehuli, ipasu-pasu Tuhan. Amin.